

Potenzials chi existan illas fracziuns da Scuol

Exposiziun «Svilup territorial dal cumün da Scuol»

DA FLURIN ANDRY / ANR

■ **Ingrondir la zona da mansteranza dad Ardez dond bada a la qualità architectonica o fundar a Vulpera üna scoula d'hotellaria sun be duos da las propostas da 18 students d'architectura. Quellas sun expostas a Nairs.** Dürant il semester da primavaira s'han occupats 18 studentas e students d'architectura dal Politecnicum ETH a Turich cun lur professor Roger Boltshauser da las ses fracziuns da Scuol. Da primavaira han els tut suot ögl in teams da trais Guarda, Ardez, Ftan, Tarasp, Scuol e Sent fond stüdis da la tipologia da las chasas e bles oter plü. «No ans vain dumandats co cha'l cumün fusiunà as dess sviluppar territorialmaing, che funcziuns cha las singulas fracziuns han e che potenzials chi existan in quellas», ha declerà in sonda Boltshauser a chaschun da la vernissascha da l'exposiziun i'l Center d'art contemporanea a Nairs. Sco exercizi han elavurà las studentas e lur collegas differents progets davart ot dumondas fundamentalas. Quellas pertoccaivan ils temas abitar, art e cultura, scoulas, giuventüna e sport, spazis libers, turissem, prodots locals e zonas industrialas. A la vernissascha d'eiran preschaints ultra dal capo da Scuol Christian Fanzun divers rapreschaints da politica ed economia.

Mantgnair la vita i'ls centers dals cumüns

Pro'l tema «abitar» s'han dumandats ils futurs architects co chi's pudess s-chaffir spazi d'abitar pajabel eir pels indigenes. Üna da lur tesas d'eira chi nu's mangless fabricar novs quartiers adüna be a l'ur

dals cumüns, chi saja pussibel da fabricar novs chasas chi's collian culla structura da fabrica existenta. Els sun gnüts a la conclusiun cha models cun abitaziuns da corporaziuns sajan ün bsögn eir in Engiadina Bassa e stessan perquai gnir promovüts. Els han disegnä e fat models co cha quai pudess gnir realisà. Lura s'hana occupats p. ex. eir cul tema «turissem», la bransch economica la plü importanta i'l cumün da Scuol. Co dess quel as sviluppar, dessa pussibilitats da far reviver grondas structuradas d'hotel chi sun hozindi vödas? Ils students sun gnüts a la conclusiun chi's stess promover plü ferm la scolaziun turistica illa regiun, p. ex. cun üna scoula d'hotellaria a Vulpera. Ch'uschea as pudessa augmantar la qualità da la sporta turistica e frenar la tendenza cha la giuventüna banduna la regiun per lavurar utrò.

Spordscher lös per l'inscunter e'l barat

Ün oter exampel d'ün tema, dal qual ils students e las studentas han s'occupats, es «giuventüna e sport». Mancan a Scuol e fracziuns, causa cha bles giuvenils van davent, lös per l'inscunter e barat? Spordscha la fusiun dals cumüns pussibilitats da reagir? Co as pudessa müdar adöver d'edifizis chi nu vegnan plü dovrats? Per cha la regiun resta attractiva eir pella populaziun indigena douvra blesas sportas pel temp liber, per far sport, ustarias, bars e lös culturals. Ün student s'ha occupà cul center Trü a Scuol chi'd es tenor el tant lö cultural sco eir per far sport. In seis proget gniss l'areal mantgnü ed ingrondi. El dvantess visibel eir fingià sü dal Stradun. I naschiss ün lö d'inscunter pels giuvenils e serviss però eir per ar-



Il professor Roger Boltshauser, il capo da Scuol Christian Fanzun e la grondcusgliera Aita Zanetti discutan la proposta dad ün dals students.

FOTO F. ANDRY

randschamaints culturals, concerts e radunanzas.

Rinforzar il spiert da cumünanza cun art e cultura

Pro'l tema «art e cultura» s'han dumandats ils students e las studentas che potenzial cha l'art e'ls implants culturals hajan pella populaziun e'l turissem. Ch'implants culturals i'ls cumüns, p. ex. in fuorma da hallas polivalentas, possan

rinforzar il spiert da cumünanza dals abitants e cumpensar la perdita da las «maisas raduondas», es l'avis dals students. «Culla Fundaziun Not Vital, il Muzeum a Susch e la Fundaziun Nairs sun nats illa regiun lös culturals importants chi daran novs impuls al turissem e stessan perquai gnir promovüts», han els accentuà. Üna studenta ha tut qua suot la marella Nairs cun seis Center d'art contemporanea, cun l'Hotel Palace

e culla Büvetta. Ella ha disegnä plans per ingrondir, prolungar la Büvetta chi stess eir a disposiziun al center d'art. In sia lavur teoretica nun ha'l gnü da resguardar la problematica culla costa instabila sur la Büvetta.

■ **Interessats pon ir a verer l'exposiziun cullas propostas dals venturs architects ed architectas dals 9 als 11 settember sün cunvegna e dals 12 als 15 settember mincha di da las 15.00 a las 18.00.**

Il blau e l'amur pel misterius e mistic

Tina Planta-Vital ha preschantà seis nov cudesch da poesias

DA FLURIN ANDRY / ANR

■ **Fin avant pacs ons d'eira Tina Planta-Vital activa impustüt sco artista pitura. Lura s'ha ella dedichada eir a sia segunda paschiun, la poesia.** Tina Planta-Vital es fingià daspö lösch ün uman creativ. Da seis bap Ulrich ha ella iertà la paschiun da pitturar ed eir l'access a l'art. Avant ün pèr ons ha l'artista lura chattà eir ils peds sco expressiun da sia creatività. «Larschs as dan il man» as nomna il prim cudesch da poesias cha Planta-Vital ha publichà avant trais ons. Ed uossa es cumparü seis seguond cudesch «il blau tocca la terra». In sonda saira ha gnü lö a Sent la prevernissascha da quista publicaziun.

Il piertan da la Grotta da cultura sü Sent d'eira stachi plain d'amias e d'amis

da la poesia rumantscha in sonda passada. Planta-Vital ha preschantà cun paschiun quieta seis seguond cudesch da poesias. La poesia es gnüda inromada da la violinista Barbla Früh. Melodias d'increschantüm da Dvořák han accompagnà la poesia ladina. Moderà la preschantaziun ha Mevina Puorger chi cun sia chassa editura editionmevinapuorger preschainta quist utuon duos volums da poesias ladin. I's tratta dal volum da Tina Planta-Vital e dal volum «innit tropic» da Flurina Badel chi'd es gnü preschantà in dumengia a Nairs. Las trais duonnas sun statta in plaina sintonia ed han creà ün bel ambiant da pled e musica. Pled, cling e la punt tanter pèr s'han dat da maniera armonica il man per drivir cour ed anim dal public attent chi's vaiva reuni aint il piertan, i'l qual la Grot-

ta da cultura da Sent spordscha lur occurrenz ad ün public plü vast.

Il blau in sias diversas fatschettas


«Tina Planta-Vital ha cumanzà a's preschantar sco autura ad ün public plü grond pür avant pacs ons», ha dit l'editura, «no tilla cugnuschaivan avant impustüt sco artista d'art figurativa. Uossa s'exprima l'amia da las culuors eir cul pled.» Cha'l blau saja il motiv central ed eir l'insaina da la racolta «il blau tocca la terra», ha manzunà Puorger, «il blau in sias diversas fatschettas, da blau s-chür a blau cler, da bod nair a bod alb e transparent, scha no ans laschain manar tras la poesia 'sco l'aua' e quel blau baderlunz da l'aua aint il 'bügl da plaz' chi doda tuot, sa tuot, tradischa be quai ch'el vöul, sa tashair e tegner il misteri da l'utschè d'üna

not per quel chi dvainta part. «Cha'l blau dvainta simbol eir pel misterius e mistic i'l muond poetic da Planta-Vital, ha ella agiunt. Autura ed editura han al cumanzamaint ed a la fin da la sairada palesà lur ponderaziuns davart ün pèr poesias da la racolta chi fuorma il nov cudesch. Planta-Vital ha in seguit dat spazi unicamaing a sia poesia. Früh ha inromà cun sia già in möd fin la part centrala da la sairada.

L'occurrenza lirica, annunzchada suot l'insaina da prevernissascha, es gnüda conclüsa cun üna marendà a la veglia, sporta da la chasa editura. La vernissascha sco tala varà lö als 2 november als Dis da litteratura a Domat.

■ **Il cudesch da Tina Planta-Vital «il blau tocca la terra», editionmevinapuorger turich 2019, pognir cumprà pro la Lia Rumantscha obain illas librarias chi furnischan cudeschs rumantschs.**

ELECZIUNS



Mario Salis, S. Murezzan pps team 60+ (glista 20)

Suenter 40 onns en servezzan dalla Polizia chantunala en la funcziun dal cumandant da la regiun Engiadina sun jau ma decidi dad ir 2013 en la pensiun prematurada. Politicamain poss jau mirar enavos sin ina viva carriera, uscheia hai jau fatg part durant diesch onns al cussegl da vischnanca da San Murezzan, da quei in onn sco parsura dal cussegl. Davent tschintg onns fetg jau part dal cussegl grond e da la cumissiun per giustizia e segirtad. Grazia a mia vegliadetgna avanzada e mia experienscha politica poss jau ma daditgar als basegns e quitads da las personas attempadas resp. da la generaziun dals pensiunads. Quai betg l'ultim damai che gista questa generaziun è oz sutrepresentada en il cussegl naziunal. Jau mettel ils sequents accents politics: rentas segiras, finanziaziun resp. sanaziun da la AVS ed ulteriurs postulats sin rucca.



Han preschantà a Sent i'l piertan da la Grotta culturala il nov volum da poesias rumantschas, la poetessa Tina Planta-Vital (schn.) e l'editura Mevina Puorger.

FOTO F. ANDRY



La cuverta dal nov cudesch da poesias da Tina Planta-Vital.

MAD